

Coordinadora Asturiana Contra la Manipulación Xenética de los Alimentos

Manifiestu

Va unos meses súpuse qu'en 2003 n'Asturies plantaranse seis hectaries de maíz modificaos xenéticamente. L'Alministración Pública, que según la llei¹ tien de tar informada y llevar un rexistru de la situación y estensión d'esta clas de cultivos, nun dio nenguna información.

Na Xunión europea hai una moratoria dafechu polo cuál nun se tan concediendo permisos de merca de nuevos cultivos tresxénicos. A esta moratoria opónense na Xunión Europea un piquenu grupu de países, ente los cuáles atópase l'Estau español. Esta paez ser la primer vegada que sémense cultivos tresxénicos pa mercar n'Asturies.

Dende l'añu 1996, hebo una medría bultante de los cultivos modificaos xenéticamente en tol mundiu; güei hai plantaes como sesenta millones d'hectárees con esta clas de semientes. Pa xustificar esta plantación aldericase que l'usu de cultivos tresxénicos cunde de tal manera qu'amuesa una vía pa finir cola fame nel mundu. Paez asina que quienes s'oponen a aquellos tan torgando l'espórpolle de la humanidá y l'avance de la ciencia.

La mayor parte de los cultivos tresxénicos, puen xuntase en dos estayes: los qu'amuesen material xenético de dalgún ser vivu que produza una cierta toxina biocida (inseuticida, funxicida...)², y los que resisten l'aplicación d'algún preparáu químico (xeneralmente herbicida). Que puede alministrase en gran cantidá ensin que la planta muerra. L'herbicida y la semientes tresxénica son producíos pela mesma empresa. La mayor parte de los cultivos tresxénicos son de la segunda categoría. La operación d'introducir una secuencia xenética d'otru organismu inclui l'usu d'un antibióticu pa ver si'l procesu fizose correchamente.

El seutor de les semientes modificaes xenéticamente atopase nes manes d'unes poques multinacionales (Monsanto, Syngenta, Pioneer, AgrEvo...) que tienen un gran poder. L'emplegu de la semiente comercializada por estes empreses desixe merca-yos tamién los productos químicos amosaos y contratar la so asesoría téunica. Amás les campesines nun pueden usar parte de la collecha como semiente pala prosima temporada y deben mercar darréu les semientes otra vuelta. Asina los cultivos tresxénicos faen mas fuertes les multinacionales del seutor, que pasen a controlar dafechu les condiciones nes que se cultiva.

La subordinación de l'agricultura y el trabayu campesín al capital ye continuu nel sieglu XX. La modernización del campu (l'usu masivu de maquinaria, fertilizantes y agrotósicos), almitida por tola sociedá y les agricultores foi la forma d'esta sumisión. Los cultivos tresxénicos apaecen como un momentu, un afondamientu d'esta llóxica. Les multinacionales del seutor controlen cuasi tola investigación, pública y privada, que se ta faciendo con cultivos y alimentos modificaos xenéticamente. Esti fechu debe facenos cuestionar munchos de los resultaos algamaos. Dalgunes investigaciones menos dependientes del sofitu privao asoleyaron varios riesgos que trai l'usu de tresxénicos: ecolóxicos, la contaminación xenética, l'apaición de resistencies a les sustancias insecticides o herbicides, l'escontrillu de los equilibrios de los ecosistemas y de la biodiversidá³...; de salú pública, l'apaición de resistencies a los antibióticos empleaos como parte del procesu, y, en xeneral, nun ta demostrada la inocuidá de los alimentos modificaos xenéticamente. Los sos riesdos amas, afeuten a l'agricultura de tribes nun modificaes y a la ecolóxica, al contaminala xenéticamente y promover l'apaición de resistencies

¹ Llei 9/2003 de 25 de abril.

² Esti ye, por exemplu, el casu del maíz BT, qu'incorpora material xenéticu d'una bacteria, el *Bacillus Turingiensis*, con propiedaes insecticies, cualquier insectu que quier xintar el maíz envelenase y muere.

³ Abulta que se te recomendando la plantación d'una serie de seches tradicionales comu abeyugu pa insectos, y asina caltener una diversidá nos ecosistemas que igüe'l dañu fechu pol cultivu xenéticamente modificáu.

qu'amenorguen la efectividá de los insecticides naturales d'esta cabera. Ya ocurrió nel estau español casos de contaminación xenética de cultivos ecolóxicos. L'escontrillu de los ecosistemas que se faen como consecuencia de la sema de cultivos tresxénicos amenorga les supuestes ventayes, de forma que, pasaes les primeres colleches, los cultivos modificaos xenéticamente cunden lo mesmo que les variedaes convencionales. Les variedaes llocales tradicionales, que collecháronse d'urante xeneraciones y que tan adautaes a les condiciones de clima y de suelu de cada fastera, dan bones colleches ensin tener de cha-y munchos fertilizantes, pesticidas y augua.

La globalización ye la estensión, afitamientu ya intensificación del capitalismo en tol mundiu. Nesti mundiu que la metada de la humanidá ye campesina y d'esta l'ochenta por cientu collecha les sos propies viandes, esi procesu desixe romper coles formes tradicionales de producción y consumu d'alimentos y les andeches qu'inda existen. Esa colonización, cada vuelta más totalitaria, d'esos estayes que nun tan somorgiaes a la llóxica de la creación de pergüeyu, esancia a millones de persones de los sos llugares d'orixen, una vegada que se ficieron inviables les sos formes de producir alimentos. Nel estau español el campu perdió a mas de cinco millones de persones na segunda metada del sieglu XX. Esta llóxica tien una violencia social ensin precedentes na hestoria, poro presentase como'l bilte del progresu, la democracia y la llibertá. Esta contrasentíu ente la realidá de los procesos y les sos formes de manifestación permiten entender, por exemplu, que l'agricultura industrializada capitalista, ensin cuya afitamientu nun s'entiende la miseria que se vive nes periferies, preséntense como la vía pa esanciar la fame nel mundiu. La estensión de la globalización nun s'entiende ensin falar d'una cadarma de complicitades que fai que parte de la población participe n'ella activamente. L'arronchamientu de les consecuencias de los nuestos fechos ye lo que fai posible, por exemplu, dir mercar a les grandes superficies y nun lo rellacionar col fechu de la perda de seguridá alimentaria, la destrucción de les economíes campesines o l'escontrillamientu ecolóxicu del planeta.

Fer posible otres formes de producir y consumir alimentos desixe güeyar a l'agroecoloxía y al consumu responsable finxu faza'l qu'empobinase. Desixe costruir formes de diálogu, reciporcidá y sofitu mutuu ente la producción y el consumu; costruir relaciones sociales no mediaes pol mercáu y la llóxica del beneficiu sinón pol preste de toles persones y la llimitación de los antoxos superfluos.